

मार्निंग डोगरी न्यूज़ बुलेटिन, समें. 09.20 Hrs

<><><><><><>

## Headlines

- प्रधानमंत्री नरेंद्र मोदी होरें आखेआ ऐ जे भारत गी इक विकसित मुल्ख बनाने दा सुखना तां गै मूर्त रूप लेई सकदा ऐ जेकर मुल्खै दा हर राज्य, हर जिला ते हर गांs विकसित होग।
- उप-राज्यपाल मनोज सिन्हा होरें आखेआ ऐ जे महिलाएं दा सशक्तिकरण जम्मू-कश्मीर प्रशासन दी पैहली तरजीह ऐ।
- मुख सचिव होरें बैंकें गी निर्देश दिता ऐ जे ओ जम्मू-कश्मीर च स्वरोजगार गी बढ़ावा देने लेई सरकारी मैहकमे कन्नै तालमेल बनाइए कम्म करन।
- ते जम्मू अज्जै थमां शुरू होआ'रदी जम्मू-कश्मीर ओपन गोल्फ टूर्नामेंट दी मेजबानी करने जा'रदा ऐ।

<><><><><><>

## PM

प्रधानमंत्री नरेंद्र मोदी होरें आखेआ ऐ जे इक विकसित भारत दा सुखना तां गै मूर्त रूप लेई सकदा ऐ जेकर मुल्खै दा हर राज्य, हर जिला, हर गांs विकसित होग। कल छत्तीगढ़ दे बस्तर च 27 ज्हार करोड़ रपे लागत दिएं बक्ख-बक्ख विकास परियोजनाएं गी देसै दे नमित करदे होई मोदी होरें आखेआ जे मुल्खै दे संसाधनें-वसीलें पर सब्बनें शा पैहला हक गरीब दा ऐ।

उनें जोर देइयै आखेआ जे सरकार गरीब लोकें दी भलाई बेहतरी लेई कम्म करने गितै पूरी चाल्नीं समर्पित ऐ, भाएं ओह कुसै बी धर्म जात या तबके दा की नेई होवे। प्रधानमंत्री होरें देसैं दे लोकें बश्कार जात-पात दे नां पर बंड पोआने दी कथित कोश्ट करने लेई कांग्रेस पार्टी दी सख्त नुख्ताचीनी कीती।

<><><><><><>

### PM-Schemes

प्रधानमंत्री स्ट्रीट वेंडर्स आत्मनिर्भर निधि, पी.एम स्वनिधि योजना राहें राष्ट्र भरै च 50 लक्ख शां मते रेहड़ी-फड़ी लाने आहलें गी लाह हासल होआ ऐ। शिड़कें पर रेहड़ी फड़ी लाने आले शैहें च रौहने आहले लोकें गी जरूरी समेयान ते सेवा उपलब्ध करोआइयै मते समें थमां शैही अनौपचारिक अर्थ बवस्था च बक्ख-बक्ख भूमिका भूमिका नभांदे न। आवास ते शैहरी मामले दे मंत्रालय दी एह पैहलकदमी च एह योजना उनेंगी औपचारिक आर्थिक दायरे च आनने लेई महत्वपूर्ण रेही ऐ। योजना दी पहुंच गी व्यापक बनाने आस्तै प्रधानमंत्री नरेंद्र मोदी हुंदे दृष्टिकोण नै एहदे विस्तार आस्तै मते सारे प्रयासैं गी प्रेरित कीता ऐ। इस बरे 1 जुलाई थमां योजना दे तैहत हासल कीते जाने आहले लक्ष्यें च संशोधन करदे होई इक अभियान शुरू कीता हा। इस दौरान केई उच्च सतह दी समीक्षा बी कीतियां गेइयां न।

पी.एम स्वनिधि योजना इक माइक्रो क्रेडिट योजना ऐ जेड़ी शैहरें च रेहड़ी फड़ी लाने आहलें आस्तै 1 जून 2020 गी शुरू कीती गई ही। एहदा मकसद बिना कुसै गरंटी दे 50 जहार रपे तगर लोन उपलब्ध करोआना ऐ।

<><><><><><>

### LG-Women

उपराज्यपाल मनोज सिन्हा होरें आखेआ ऐ जे महिलाएं दा सशक्तिकरण ते उनेंगी उन्दे सब्बै अधिकार देना जम्मू-कश्मीर प्रशासन दी बचनबद्धता ते सब्बनें शा पैहली प्राथमिकता ऐ। कल श्रीनगर च देवकी आर्या पुत्री पाठशाला दे स्थापना दिवस आले समारोह गी संबोधित करदे होई सिन्हा होरें आखेआ जे स्हाड़ियां धीयां, हर खेतर च कामयाबी हासल करै करदियां न ते नारी शक्ति, जम्मू-कश्मीर ते पूरे राष्ट्र दी विकास जातरा च अहम भूमिका अदा करै करदी ऐ। उनें आखेआ जे शिक्षा इदारें गी लोड़चदा ऐ जे ओह मनुक्खी कदरें, ज्ञान ते समाजी चेतना बक्खी मता ध्यान केंद्रित करन तां जे युवा शक्ति अपने भविक्ख गी नमां आकार देइयै राष्ट्र दी तकदीर ससंवारने-जोग बनी सकै।

<><><><><><>

### Basohli GI-Tag

उद्योग ते बपार मैहकमा जम्मू-कश्मीर दे अनथक जत्नें दी बदौलत हून बसोहली दे पशमीने गी जी.आई टैग हासल होई गोआ ऐ।

एहदे शा पैहले बसोहली दी चित्रकारी ते राजौरी दी लकड़ी पर कीती जाने आली चिकरी कारीगिरी गी बी विशेष इलाकाई पंछान आला एह टैग हासल होआ हा। बसोहली पशमीना गी एह पंछान दस्तकारी आली श्रेणी च हासल होई ऐ। बसोहली दा पशमीना, जम्मू प्रांतै दे कठुआ जिले दे बसोहली इलाके दी विशेष पंछान ऐ जेड़ी 100 बरे कोला बी मती परानी मकामी रिवायत ऐ। जी.आई टैग थहोने देबाद इस विशेष कारीगिरी गी नमीं पांन थहोग ते इसी तेयार करने दे कम्मे च नमें सिरेआ जान भी जाई सकोग।

Kathua

आत्मनिर्भर भारत लेई प्रधानमंत्री नरेंद्र मोदी हुंदे पाठ थमां प्रेरणा लेंदे होई जिले दे इक काबल नौजवान नै सरकारी नौकरी दे पिच्छे द्रौड़ने दे बजाय अपना कम्म-धंधा स्थापित करियै समाज लेई इक मिसाल पेश कीती ऐ। कठुआ जिले दे लखनपुर इलाके दा बसनीक सन्नी मल्होत्र नांs दा नौजवान ग्रैजुएट होने दे बावजूद भल्ले बेचियै आत्मनिर्भर बनै करदा ऐ। उन्नै अपने नमें विचारें कन्नै कम्मकाज दे तौर-तरीकें च बदलाव आहन्नेआ ऐ ते अज्ज ओह उस इलाके दा मशहूर चेहरा बनी गेदा ऐ।

<><><><><><>

DHS-Jammu

सेहत सेवाएं ससरबंधी जम्मू निदेशालय “आयुष्मान भव” अभियान दे तैहत जम्मू प्रांतै दे बक्ख-बक्ख सेहत इदारें च केई चाल्ली दिएं गतिविधिएं दा आयोजन करोआ करदा ऐ।

13 सितंबर 2023 गी शुरू कीते गेदे “आयुष्मान भव” अभियान दे तैहत सेहत ते नरोएपन सरंधी हेल्थ एंड वेलनेस केंद्रें च ते समुदायिक सेहत केंद्रें च आयुष्मान सेहत मेलें दा सरिस्ता कीता जा'रदा ऐ जित्थे लोकें दे “आभा” कार्ड बनाने दे इलावा उनेंगी आयुष्मान भारत प्रधानमंत्री जन आरोग्य योजना ते होरनें सेहत स्कीमें दे बारै च लोकें ग जागरूकत कीता जा'रदा ऐ।

Sikkim

हुनै-हुनै थहोई दी इक खबर मुजब सिक्कम दी लाचेन घाटी च तीसता नदी च चानचक्क हाड़ आई जाने कारण फौज दे 23 कर्मी लापता होई गेन। तुपाई ते बचाव कार्रवाई जारी ऐ। एह जानकारी समाचार एजेंसी एन.अई.नै रक्षा प्रवक्ता गोवाहाटी दे हवाले कन्ने एह खबर सांझी कीती ऐ।

Chief-Secretary

मुख्य सचिव डाक्टर अरुण कुमार मेहता होरें सब्बनें बैंकें गी सरबंधित मैहकमें कन्ने मिलिए कम्म करने लेई जोर भरेआ ऐ तां जे जम्मू-कश्मीर केंद्र शासित प्रदेश बी बैंकिंग क्षेत्र गी परिभाषत करने आले पैमाने पर खरा साबत होई सकै। कल श्रीनगर च केंद्र शासित प्रदेश सतह दे बैंकें दी समिति यू.टी.एल.बी.ससी दी 11मीं बैठक दी अध्यक्षता करदे होई मुख्य सचिव होरें बैंकें गी डिजिटल लैन-देन गी बढ़ावा देने लेई आखेआ तां जे बिजन नकदी आली अर्थ बवस्था दे उद्देश्य गी हासल कीता जाई सकै।

जम्मू कश्मीर बैंक दे प्रबंध निदेशक ते मुख् कार्जकारी अफसर बलदेव प्रकाश होरें जानकारी दिती जे स्वरोजगार उत्सव पर लोकें दी दिल बधाने आली प्रक्रिया दिक्खने गी लब्बी ऐ ते अजें तोड़ी 55 ज्हार 756 लाभार्थिं गी बैंकें 1 ज्हार 32 करोड़ रपे दे दोआर कर्जे मंजूर कीते न। इस बैठका च घरें मकानें ते शैहरी विकस दे प्रधान सचिव, खजाना मैहकमे दे प्रधान सचिव, केई प्रशासनिक सचिव, भारती रिजर्व बैंक ते नाबार्ड दे जनरल मैनेजर ते सरकार दे होर केई सीनियर अफसर बी मजूद हे।

<><><><><><>

DC-Jammu

जम्मू दे डिप्टी कमिशनर सचिन कुमार वैश्य होरें बन्ने कन्नै लगदे ग्रां दे विकास लेई निर्देश तय कीते न। कल लाई गेदी इक बैठक च उनें सरहदी ग्रां लेई खास जत्न करने दी जरूरतें पर जोर पाया ते एसडीएम-एं गी एह जिम्मेदारी दिती जे ओह अपने सरबंधत इलाकें च सेहत सहूलतें ते आंगनवाड़ी केंद्रें वगैरा दे जायजे करोआन। डिप्टी कमिशनर होरें युवा सेवाएं ते खेड्डें सरबंधी विभाग, खुराक, नागरिक सप्लई ते उपभोक्ता मामलें सरबंधी विभाग ते समाज कल्याण विभाग गी निर्देश जारी कीते ते जम्मू जिले च शिक्षा खेततर दे कम्मकाज दा जायजा लैता।

<><><><><><>

Udh-Skill

उधमपुर दिएं डिप्टी कमिशनर सलोनी राय होरें कल जिला कौशल समिति दी इक बैठक लाइयै जिले च बेरोजगार नौजवानें दे अगेत्रे हुनर विकास बारै सलाह-सुत्तर कीता। इस मौके एह फैसला लैता गेआ जे स्वरोजगार आली बक्ख-बक्ख सरकारी योजनाएं तैहत 15 ज्हार नौजवानें गी बक्ख-बक्ख हुनरें दी सिखलाई दिती जाग।

डिप्टी कमिशनर होंरें जोर देइयें आखेआ जे कौशल विकास आली योजनाएं दा मुंडला मकससद जिले च कोशल विकास आली इक तगड़ी प्रणाली स्थापित कररना लोइचदा ऐ। एह प्रणाली नौजवानें गी कौशल विकास दे बद्दोबद्द मौके उपलब्ध करोआग ते उनेंगी रोजगार तुप्पने लेई जिले शा बाहर नेई जाना पौग।

### Doda

डोडा जिला प्रशासन नै भद्रवाह थमां निकलने आली नीरू नदी गी साफ करने दी इक योजना तैयार कीती ऐ जेदे तैहत बक्ख-बक्ख मैहकमे जिंदे च पीडब्ल्यूडी, जल शक्ति ते मैहकमा ग्रामीण विकास बी शामिल न, दी मदद कन्नै इस नदी दी साफ-सफाई दा कम्म कीता जाग। डोडा दे जिला विकास कमिशनर विशेष महाजन होंरें कल इस बारे सद्दी गेदी इक बैठक दी अध्यक्षता करदे होई जानकारी दिती जे इस लौहकरी नदी जिसी नीरू नाला बी आखेआ जंदा ऐ, गी औंदे दऊं म्हीनें च साफ करने दे कम्मैं च बक्ख-बक्ख मैहकमें दे इलावा पंचैती राज इदारें ते आम जनत दा बी सहयोग लैता जाग। डीसी होंरें डोडा च ट्रैफिक प्रबंधन, साफ-सफाई दे कम्मैं ते बहुमंजला पार्किंग परियोजना दे कम्मैं दा बी जायजा लैता।

### Golf

जम्मू ते तवी गोल्फ कोर्स च अज्जै थमां जेएंडके ओपन गोल्फ टूर्नामेंट दा सरिस्ता कीता जा करदा ऐ। जम्मू-कश्मीर दे सैलसफा विभाग पाससेआ प्रोफेशनल गोल्फ कोर्स आफ इंडिया. पी.जी.टी.आई. कन्नै रलिये आयोजित कीती जा करदी इस प्रतियोगिता च अंतरराष्ट्री स्तर दे केई गोल्फ खड्गारी हिस्सा लैडन।

इस बार कल जम्मू च इक संवाददाता सम्मेलन गी संबोधित करदे होई सैलसफा मैहकमे दे सचिव डाक्टर सैयद आबिद रशीद शाह होंरें दस्सेआ जे चऊं दिनें दी इस प्रतियोगिता दी पुरस्कार राशि 50 लक्ख रपे होग। उनें दस्सेआ जे इस प्रतियोगिता दे राहें प्रदेश च गोल्फ सरंबंधी सैलसफा गी बढ़ावा मिलोग ते अंतरराश्ट्री सतह दे गोल्फ खड्गारिएं गी डुग्गी दी सगगोसार संस्कृति बारै जानने दा मौका बी थहोग।

U-19

खेड्ग स्टेडियम डोडा च आयोजित 19एं बरें कोला हेठली उम्मी दे जागतें दी सुबाई सतह दी खो-खो चैंपियनशिप दा खताब डोडा जिले नै जम्मू गी हराइयै जिती लैता ऐ। जिसलै जे उधमपुर नै त्री थार हासल कीती ऐ ते कठुआ जिला चौथे नम्बरै पर रेहा। डोडा च एह खेड्ग समारोह पिछले म्हीने दी 12 तरीक गी शुरू होआ हा जेड़ा कल मुक्की गेआ ते एहदे च केंद्र शासित प्रदेश दे बक्ख-बक्ख जिलें थमां 1300 जागतें-कुड़िएं हिस्सा लैता